

TSHIUSHUASS

Etuat Rich

Eukuan tshe atanutsheian.

Ne auass Tshiushuass ishinikatakanu. Uitimushishu nenua auassa, nenua ishkuessa uitimushishu an. Uenuiti, natakashkuaishu ne ishkuess, kie uin mani katshi unuiniti ekue natamuat nenu anite niatikashkuaiminiti, ekute anite niatakashkuaishit mani. Ekue tshek utauassimit, tshek tashinua utauassima ne ishkuess.

— Auen nenua uetauassimikashk ? itakanu ne ishkuess.

— Apu tshissenimak, iteu. Nasht apu tshissenimak anite nipa ut utauassimin.

Kie nenua ukauia eukuan etikut mani.

— Mauat, mauat apu tshissenimak, iteu, anite nipa ut utauassimin, nasht apu tshissenimak.

Ek^u tshishennu iteu (uashamakaniht innuat uetakussinit kassinu, uashkapinanu ne mitshuap) :

— Tshika tshishitiku ne uetauassimit, iteu.

Uiashkapaniakanit tapue ne auass. Ne ma Tshiushuass nana apishu tshipishkuat, manakanit, ek^u tshishitikushu. Ek^u ne Uhutshipan mautshishikueu, ui utauassimu nenua, ui utauassimikueu nenua kie uin, ekue mautshishikuet.

— Minuat pimipaniek^u ! itakanu ne auass.

Minuat pemipaniakanit. Ek^u nana tauishkuat nete apu ne Uhutshipan eshinikashut. Ek^u sheshtikuatamuat nenu upassikanishinu ek^u uet papatshikushinit nenu ushik^u ne ka ui utauassimit.

— Ek^u, iteu, ka-nitshishitikua !

— Ka-tshishishtikaunaua nana ! itakanu.

Ek^u uetitshipaniakanishit nana auass, nahi Tshiushuass, minuat ekue tshishitikut.

— Eukuan uetauassimit ! itakanu.

— Tshika uepinikaunau anutshish, itakanuat. Apu tshika tshi minu-apatshikauek^u, natamik^u tshitaitinau, itakanu nana ne ishkuess. Tshika nakatikaunau uapaki, itakanuat.

Ek^u tapue tshetshipitshinanut uiapak, nakatakanu ne ishkuess kie ne auass, ne Tshiushuass. Katshi nakatakaniht, ek^u niatahk nenu peik^u mitshuapinu. Eukuannu kuetuet ek^u nenua tshishtapakuna anite itaneshu, uitshikashu. Ek^u anite ianashit nenua utauassimisha.

— Ashtamite ute ! iteu. Ute api, ute kutuanit.

Ekue itutet ne ishkuess (tanite apitshitshishu¹ kie nenua utauassima apitshitshishinua). Ekute anite ianashit. Ek^u ne Tshiushuass papamuteu nete, ekue mishkak uapuiana kie auassiu-matshunisha mishkam^u. Uieuetashpitat nenua utauassima ne ishkuess, ekue akunauat nenu uapuiannu. Eshpish ma anite papamutet, kassinu tshekuannu mishkam^u, kie mitshiminu iapit mishkam^u. Matshishuht ek^u. Nipinnu nenu, shash nipinnu.

¹ Apishissishu e massenimakanit auen.

Eshpish taht anite, ek^u mishishtishu shash ne auass, mishta-tshinipitshu.

Ek^u iteu nenua utishkuema :

— Shash tshitshue tshutau shiuenitak, nika natuapamau ek^u.

— Ushte, eka nutshiku, iteu ne ishkuess, eka nutshiku ekush shiueniti.

— Mauat, itiku, apu ishinakuak. Tshutau an.

Tshatuteht. Ukussa uitsheueu, shash mishishtishinua ukussa uatsheuat.

Uetitaht nete etaniti, shash tshitshue tshimakateu ne tshishennu.

— Tshitshue apu nita mishkamat ek^u mitshim, iteu nenua. Auen tshinuau ?
iteu (mishta-utshimaunakushinua tanite unatshima).

— Ninan au ka nakashiat anite matukapit, itiku. Nete matukapit ka
nakashiat, ninan au. Eukuan ne nikuss ka apitshitshishit.

Ekue utinat nenua ussima, metutueu ne tshishennu nenua. Ekue
ishitapatshitutuakut mitshiminu, mishtikushiu-mitshiminu muk^u eshi-mitshishut.

Ekue minikut ekue tshiu et ne napeu, ne Tshiushuass. Tshauet, uitamueu
utishkuema. Ek^u itiku nenua :

— Eka nash !

— Mauat, iteu. At eka natak tshutau, tshek tshipa tshimakateu, kie tshipa
mitshetu tshipa tshimakateu nanitam auen. Kie ma umenu minakui mitshiminu,
anite inniutau innuat, ek^u tshe ut miniminituht tshekuannu enutepanitau. Ek^u eka
tutamakui ne, tshipa mitshetu tshipa tshimakateu auen.

— Eshe, itiku nenua utishkuema.

Ekue ishitapatshitutu^uat mitshiminu tapue, ekue minat.

Katshi tatshipunitishut ne napeu, ek^u netuapamat nenua unatshima (uitshinua
anite tanite). Kassinu tshekuannu kanuenitamuat ne Tshiushuass, mitshiminu. Ek^u
piapitshiht innuat, mishta-mitshetu^uat.

— Kushapatshikanikuk^u ! iteu. Kassinu tshekuan tshika kuetipashtanau :
unakana, nei uta kie assikua.

Ek^u tapue eukuan etutakaniti. Kueshapatak ek^u. Katshi kushapatak ekue :

— Ashak^u, iteu, eka matshik^u ! Tshe eka tatshinamek^u tshunakanuaua !

Ek^u tepatshimut itakanu Mishtapeu. Tshek pietahk anite unakanit
tatuepannu tshekuannu, ne kukuminashish ashpikueshimushu nenu. Eukuannu
tetuepannit tshekuannu anite unakanit. Ekue tatshinak. Tshekuannu, shaieua
anite unakanit ma ! Ekue natshipannit nenu ukushapatshikan.

— Tshitatshinenauatak tshunakanuaua ! itikuat.

— Auen tiatshinak unakan ? itakanu.

— Nin au nitatshinen nunakan, iteu kukuminashish, shaieuat
ute tatakak.

— Eukuan an ! itakanu.

(Kassinu tshekuan apitussineu, apitussinenua unikana.)

— Eukuan eshpish tshi tutaman, iteu, tanite tshitatshinenau. Tshipa
shakassinepan tshekuan, kassinu.

Kassinu nenua uta kie uapatakanua, apitussineua kassinu. Kassinu
tshekuan eishi-mitshimut apitussineu. Kie matshunisha passe anite takuana utit,
apitussineua iapit.

— Eukuan ma, iteu, eshpish tshi tutaman. Atut put nitshi tuten minuat. Eka
tatshinamekuakue, tshipa shakassinepan kassinu tshekuan.

Ek^u matshishunanut tapue. Mishta-mitshen mitshim. Eukuan eshpish tat.

Ekuannu, shash.